

Reykjavíkurborg
b.t. Helga Grímssonar, sviðsstjóra
Skóla- og frístundasvið

Reykjavík, 6. nóvember 2019
Tilv. SFS2019020105

Efni: Umsögn stjórnar foreldrafélags Kelduskóla, f.h. foreldra barna í skólanum, við samþykktu tillögu á fundi skóla- og frístundaráðs hinn 22. október sl. um framtíðarskipulag skóla- og frístundastarfs í norðanverðum Grafarvogi

Vísað er til erindis þíns til stjórnar foreldrafélags Kelduskóla, dags. 22. október sl., þar sem óskað er umsagnar foreldrafélagsins við tillögu skóla- og frístundaráðsfulltrúa Samfylkingarinnar, Viðreisnar og Pírata, sem samþykkt var á fundi skóla- og frístundaráðs hinn 22. október sl., um framtíðarskipulag skóla- og frístundastarfs í norðanverðum Grafarvogi. Ljóst er að áætlanir þessar, sem meirihlutinn í Reykjavík stendur fyrir, miða að því að loka Kelduskóla Korpu sem staðsettur er í Staðahverfi og stefna þar með hverfabýggð í hættu, ásamt því að umturna um leið núverandi skólahaldi í norðanverðum Grafarvogi með keðjuverkandi neikvæðum afleiðingum fyrir um 820 börn.

Foreldrafélag Kelduskóla, f.h. foreldra barna í skólanum, vinnur ötullega að því að standa vörð um hagsmuni og stuðla að bættum réttindum barna í skólanum. Það er mat okkar að fyrrgreindar breytingar séu ekki til þess fallnar að bæta skólastarfið og vinni raunar þvert gegn hagsmunum þeirra barna sem breytingarnar taka til. Í því sambandi ber fyrst að nefna að gríðarlega öflugt og faglegt starf fer fram í Kelduskóla Korpu sem foreldrum og börnum sem sækja skólann er umhugað um að standa vörð um og efla með öllum tiltækum ráðum. Skólinn er einn af örfáum þekkingarskólum á landinu og var þess utan verðlaunaður af skóla- og frístundasviði Reykjavíkurborgar fyrir framúrskarandi starf auk þess sem hann var tilnefndur sem einn af fjórum þekkingarskólum í Reykjavíkurborg. Það skýtur því skökku við að heyra nú af samþykkt meirihlutans á tillögu þess efnis að loka beri skólanum með vísan til fækkunar barna í hverfinu, enda tala staðreyndir öðru máli eins og hér verður næst rakið.

Staðreyndir málsins eru þær að í gildandi deiliskipulagi fyrir Staðahverfi er gert ráð fyrir grunnskóla fyrir 170 börn og hefur því ávallt legið fyrir að gert sé ráð fyrir því að Korpuskóli sé lítill skóli. Í dag eru börn með skráð lögheimili í hverfinu komin yfir þá tölu sem upphaflega er gert ráð fyrir í deiliskipulagi hverfisins þegar það væri í jafnvægi (120 börn), þar sem um 140 börn eru nú með skráð lögheimili í hverfinu. Í umræðum meirihlutans í

Reykjavík hefur því verið haldið fram að fjöldi grunnskólabarna í Staðahverfi sé í kringum 60 börn og því standi skólahald ekki undir sér. Það sem aftur á móti hefur ekki verið vilji til að nefna í opinberri umræðu er það að eldri börnum í hverfinu hefur með markvissum aðgerðum meirihlutans í borgarstjórn verið beint í aðra skóla utan hverfisins eftir að mygla kom upp í skúrum sem hýstu börn á unglingastigi. Á þeim tíma voru aðgerðirnar kynntar sem tímabundnar og foreldrum þeirra barna sem undir aðgerðirnar féllu lofað að börnin fengju að snúa aftur í skólann þegar umbætur hefðu átt sér stað í húsnæðismálum. Þau loforð var aftur á móti ekki staðið við en samgöngubótum heitið í þeirra í stað. Skemmst er frá því að segja að loforð um samgöngubætur hafa enn þann dag í dag ekki verið efnd og engar umbætur átt sér stað í samgöngumálum á svæðinu. Það er því fráleitt að halda því fram í umræðunni að hugmynd um að flytja börn í aðra skóla utan hverfisins gangi upp með vísan til aukinna samgönguúrþóta sem hingað til hefur enginn fótur verið fyrir. Óvissuástand varðandi framtíð Korpuskóla er ein helsta ástæða þess að foreldrar í Staðarhverfi hafa fundið sig knúin til að sækja um skólavist fyrir börn sín í öðrum hverfum og er ástæðan því sannarlega ekki sú að foreldrar kjósi að senda börn sín í skóla utan hverfisins. Enginn fótur er því fyrir því að halda því fram að börnum í hverfinu fari fækkandi. Með vísan til deiliskipulags í Staðahverfi hafa íbúar því haft réttmætar væntingar til þess að geta nýtt sér þá lögbundnu grunnþjónustu sem nú er veitt í hverfinu, þ. á m. að senda börn sín í grunnskóla í hverfinu. Að mati foreldra er enn fremur augljóst að fyrirætlanir meirihlutans hafa áhrif á fasteignamat og eru auk þess brot á deiliskipulagi, sem vissulega er ígildi lagasetningar.

Hugmyndir meirihlutans hafa þó ekki einungis óhagræði í för með sér fyrir börn í Staðarhverfi enda er hugmyndin sú að samhliða því að leggja niður skólann í Staðarhverfi verði Kelduskóli - Vík gerður að safnskóla fyrir unglunga í norðanverðum Grafarvogi. Þannig hafa breytingarnar í raun í för með sér keðjuverkandi óhagræði fyrir allt upp í 820 börn á grunnskólaaldri í norðanverðum Grafarvogi. Í öllu falli er ljóst að nái breytingarnar fram að ganga mun u.þ.b. helmingur barna á grunnskólaaldri þurfa að sækja skóla út fyrir sitt eigið hverfi. Gefur auga leið að óhagræðið er mest fyrir börn sem tilheyra yngstu kynslóðinni sem þurfa mörg hver að ferðast langar vegalengdir yfir umferðarþungar götur til að sækja skóla utan síns hverfis. Eins og þegar hefur verið vísað til hefur allt frá árinu 2012 staðið til að betrubæta samgöngur í norðanverðum Grafarvogi. Vanefnd loforð meirihlutans sem og reynsla af skólaakstri hingað til gefur foreldrum ekki góð fyrirheit um betrubætta þjónustu í samgöngumálum. Þá eru hugmyndir um að koma til móts við þau börn sem búa í löngu göngufæri frá nýjum skólum með skólarútum auk þess í hrópandi andstöðu við ákall alþjóðasamfélagsins um að taka mið af umhverfissjónarmiðum við ákvarðanatökur hins opinbera. Ljóst er að skólaakstur er afar kostnaðarsamur fyrir sveitarfélagið og auk þess ekki forsvaranlegur m.t.t. kolefnislosunar út í andrúmsloftið. Auk kolefnisfótsporsins, sem augljóslega leiðir af tillögu um skólaakstur, er til þess að líta að skólaakstur hentar ekki þegar börn þurfa að sækja frístund eða hitta félagi sem þau hafa kynnst í skólanum og búsettir eru í öðrum hverfum. Ljóst er af framangreindu að gríðarlegt umferðaróryggi og slyshætta fylgir tillögunum auk óhagræðis fyrir foreldra sem standa frammi fyrir því að þurfa að hlaupa undir bagga með akstri á milli hverfa eftir skólatíma er skólaaksturs nýtur ekki við.

Þá er sorglegt að horfa til þess að í umræðum meirihlutans hefur því verið haldið fram að samráð hafi átt sér stað við foreldra barna í hverfinu og í nærliggjandi hverfum. Staðreyndin er hins vegar sú að ekkert haldbært samráð hefur átt sér stað og því síður verið hlustað á sjónarmið foreldra sem mótmælt hafa harðlega lokun skólans og umbyltingar á skólakerfinu í norðanverðum Grafarvogi. Fyrir liggur að einn starfshópur hefur verið stofnaður fyrir þau 820 börn sem búsett eru í norðanverðum Grafarvogi og fengu einungis tveir foreldrar sæti í þeim starfshópi. Þá var settur saman rýnihópur með 24 foreldrum sem gefinn var ein klukkustund til að setja fram sín sjónarmið. Einn fundur hefur verið haldinn á vegum skóla- og frístundasviðs með íbúum í Grafarvogi þar sem hugmynd um lokun Korpuskóla mætti gríðarlegri andstöðu íbúa og í kjölfar þessa hafa foreldrar sjálfir þurft að kalla eftir fundi með kjörnum fulltrúum við dræmar undirtektir meirihlutans. Staðreyndin er því sú að hvorki hefur verið hlustað á mótbáru foreldra við fyrirætlunum meirihlutans né tillögur þeirra að öðrum áætlunum sem miða að því að standa vörð um faglega og rekstrarlega uppbyggingu Kelduskóla Korpu, t.a.m. með sameiningu grunn- og leikskóla eins og Reykjavíkurborg fyrirhugar í Skerjafirði. Með því móti myndu áhugaverð tækifæri bjóðast nemendum á yngsta stigi eins og tíundað hefur verið í áætlunum um samsvarandi skóla í Skerjafirði. Gríðarleg samastaða er meðal foreldra um að sporna gegn framangreindum fyrirætlunum og hafa margir foreldrar brugðið á það ráð að senda fjöldapósta á borgarfulltrúa í Reykjavík þar sem þrýst hefur verið á þá að láta af hugmyndum meirihlutans. Þá hafa margir foreldrar einnig lýst afstöðu sinni til breytinganna í fjölmiðlum með svo gott sem engum undirteknum eða áheyrn frá meirihlutanum. Þá hafa jafnframt grunnskólakennarar í skólanum sent frá sér ákall um að látið verði af umræddum áformum.

Rekstur grunnskóla er lögbundin grunnþjónusta og eiga öll börn á grunnskólaaldri rétt á því að sækja skóla í sínu nærumhverfi. Foreldrar telja þær tillögur og ástæður sem lagðar hafa verið fram af hálfu skóla- og frístundaráðs Reykjavíkurborgar vegna fyrirhugaðra breytinga órökstuddar og beinlínis vinna gegn hagsmunum barna á grunnskólaaldri í norðanverðum Grafarvogi. Þannig verði systkinum og vinum tvístrað og uppbygging og fasteignavirði Staðarhverfisins lagt í hættu. Þekkjast dæmi um það að íbúaf lutningar úr Staðarhverfi séu nú þegar hafnir vegna umræddra áforma meirihlutans. Óhætt er því að segja að áætlanirnar séu foreldrum og börnum í norðanverðum Grafarvogi afar þungt áhyggjuefni.

Þá er það grundvallar meginregla í íslenskum rétti að allar ákvarðanir sem varða börn skuli fyrst og fremst miða að því að tryggja hagsmuni barna. Skal ennfremur tryggt við slíka ákvarðanatöku að sjónarmið barna og forsjáradila þeirra fái hljómgrunn og því afar mikilvægt að virkt og faglegt samráð eigi sér stað áður en ákvörðun er tekin. Sjónarmið um hagræðingu í rekstri og sparnað eru ekki forsvaranleg við slíkar ákvörðunartök. Þá er það jafnframt ekki forsvaranlegt að spara í lögbundinni grunnþjónustu til að eyða svo sparnaðinum í önnur verkefni sem ekki eru lögbundin. Það er á ábyrgð Reykjavíkurborgar að bregðast við fjárhagslegum halla án þess að slíkt bitni á lögbundinni grunnþjónustu og hagsmunum barna á grunnskólaaldri í Grafarvogi. Forgangsatriði hjá Reykjavíkurborg ætti því að vera að veita auknu fjármagni til viðhalds og stuðnings inn í hverfisskólana þannig

að þeir nái að reka sig áður en til frekari sparnaðaraðgerða á borð við lokun skóla og sameiningar kemur til skoðunar. Slíkar fyrirætlanir hafa mjög afdrifaríkar afleiðingar í för með sér fyrir viðkomandi hverfi enda byggist byggðin upp í kringum skólana. Sögulegt góðæri er nú í rekstri borgarinnar og auk þess er ljóst að foreldrar í Staðarhverfi skila um milljarði á ári til hennar. Það er ákall foreldra að þeir fjármunir verði nýttir í samræmi við þann vilja foreldra sem hér hefur verið nefndur.

Foreldrar í Grafarvogi eru þeirrar skoðunar að tími sé kominn til að taka á þeirri meinsemd sem úrelt viðhorf til vinnubragða meirihlutans er augljóslega orðin og standa vörð um skólana okkar sem eru hjartað í hverfunum og algjör forsenda fyrir hverfabýggð. Kjörnir fulltrúar eiga að okkar mati að vinna í samræmi við vilja þeirra íbúa sem ákvarðanir þeirra beinast að og átta sig á því að starf þeirra er þjónustustarf en ekki yfirboðarastarfi þar sem ákvarðanir eru teknar í geðþótta, svo jaðri við valdniðslu. Verði ekki fallið frá fyrirætlunum meirihlutans eða íbúakosningu um tillögurnar hrint af stað er þolinmæði foreldra í Víkur- og Staðahverfi á þrotum og allur réttur áskilinn til að leita lögbundinna leiða til að sporna gegn þeim fyrirætlunum sem meirihlutinn í borginni hefur í hyggju að þröngva yfir á íbúa og börn hverfisins. Enda miða áætlanirnar að mati foreldra alls ekki að því að standa vörð um hagsmuni barna.

Við skorum á Reykjavíkurborg að hörfa alfarið frá umræddum áformum um lokun Kelduskóla og setja í forgang að leysa þann vanda sem upp er kominn með hverfislegum stuðningi, án þess að umbylta rótgrónu skólakerfi í Grafarvoginum.

Virðingarfyllst,
f.h. stjórnar foreldrafélags Kelduskóla,

Sævar Reykjalín
formaður